

# **TUSI TAIALA**

---

**MO LE PULEA MA LE VA'AIA LELEI O I'A MA FIGOTA**

---

**O LE AFIOAGA O**

**Satalafai**

**ma**

**Sapulu**

**SALELOLOGA**

**Me 06. 1997**

**SAUNIA:**

Pule mamalu a Alii ma Faipule ma tagatanuu pitonuu o Satalafai ma Sapulu, o le Afioaga o Salelologa, faatasi ai ma le lagolagosua a le Ofisa o Faigafaiva o le Matagaluega o Faatoaga ma Faigafaiva.

**FAASOLOGA**

## **1. UPU TOMUA**

O le faaititia o i'a ma figota i Samoa e afua mai i le anoanoai o mafuaaga eseese. O nisi o nei mafuaaga e aofia ai;

- le tanumia o vaega o le gataifale mo eleele-fou (fanua)
- le soona fagotaina faa-le-tatau o le gataifale e le aufaifaiva
- faaaogaina o faigafaiva-le-talafeagai
- ma aafiaga mai i afa malolosi (Ofa 1990, Val 1991, Heta 2004) ua tuanai.

O nei faafitauli o loo tulai mai pea i gataifale o si o tatou atunu ma o loo avea lea ma auala e faaititia ai i'a ma figota. O le faaititia o i'a ma figota, o le lē maua foi lea e tagatanuu o porotini mai nei meaai sami. O se atugaluga tele lea i le Malo o Samoa na mafua ai ona faatino nisi o tulafono e pei ona faailoaina atu i lalo.

### **Tulafono Autu Tau Faigafaiva**

O le tausaga e 1988 na pasiaina ai e le Kabeneta le **Tulafono Autu Tau Faigafaiva** e faamalosia ai le (i) laiseneina o vaa-fagota mo fagotaga, (ii) faasaina le faia o faigafaiva-le-talafeagai i ogasami o Samoa. Peitai ane o nei tulafono uma e lei silafia e le toatele o tagatanuu o Samoa i ia vaitaimi. O se tasi o mafuaaga ona o le toaitiiti ma le toagaogao o le aufaigaluega. Ae o se isi mafuaga ua talitonu le taofi na faigata ona ausia ai lea tulaga ona e le'i iai se polokalame i lea vaitaimi e pei o le Polokalame o le Faasao o le Gataifale mo Nuu ma Afioaga. O lenei polokalame e pei ona faatinoina nei, ua fesoasoani tele i le faa-malamalamaina mo le silafia e le mamalu o le atunu o ia tulaga.

### **Tulafono Faatonutonu mo le Laiti o I'a ma Figota**

I le tausaga 1995 na pasiaina ai e le Kabeneta le **Tulafono Faatonutonu e Faatapulaaina ai le Laiti o I'a ma Figota**. O lenei tulafono na pasiaina ma le faamoemoe e tuu avanoa ma fesoasoani i le faasaoina o i'a ma figota ua tauau ina mou atu. O le faatapulaaina o le laiti o i'a ma figota e faataga mo le fagotaina ina ia ausia le lapopoa ina ia mafai ona tautuufua ma fanafanau e faatupulaia ai le faitau aofai o le tamaoaiga o le gataifale.

### **Tulafono Laiti**

O **Tulafono Laiti** a nuu ma afioaga ua amanaaina e le Faamasinoga. O se tasi lea o auala ua tuu sa'o ai e le Malo le malosi i nuu ma afioaga e mafai ai ona o latou molia i le tulafono soo se tagata e le usitaia tulafono ua aiaia i totolu o le Tusi Taiala o pitonuu o Satalafai ma Sapulu o le afioaga o Salelologa. O nei tulafono o loo i lalo o le vaega o Tulafono ma Faasalaga o le Tusi Taiala aua le pulea tatau ma le vaaia lelei o le gataifale i tulaga o ona tamaoaiga ma lona siosiomaga mo se lumanai manuia. O tulafono laiti e soalaupuleina ma autasi iai le Pule Mamalu a Alii ma Faipule o afioaga taitasi.

### **Tala'aga : Polokalame o le Faasaoina o le Gataifale i Alalafaga ma Afioaga**

O le Polokalame o le Faasao na amataina e le Ofisa o Faigafaiva i le tausaga e 1995. I le amataga mai la o lenei polokalame sa lagolagoina malosi e le Malo o Ausetalia e auala ma i lana AusAID i le faa-tupeina mo le 5 tausaga seia oo mai i le tausaga e 2000 ma faamuta ai loa lana fesoasoani. I lea lava tausaga, sa tauaveina mai ai loa e le Malo o Samoa le faatupeina o lenei polokalame taua. O le talitonuga ma le faamoemoe autu o le tele o nei afioaga o le silisia lea i le lumanai manuia mo tagata lautele o le afioaga aemaise ai o tupulaga lalovaoa.

O le polokalame o le Faasao e galulue soosoo-tauau ai le ofisa ma afioaga taitasi i nisi o fuafuaga faataatitia auā se lumanai manuia aemaise o le toe faa-tamaoaigaina o le gataifale. I le amataina o lenei polokalame e faatinoina ai ni faatalatalanoaga ma vaega eseese o le nuu e pei o le vasega o matai, tina ma aumaga. O nei fefaaasoaaiga e faailoa mai ai faafitauli o loo faafeagai ma le gataifale o le afioaga. E talanoaina foi aafiaga ma mafuaaga o nei faafitauli ma soalaupule ai ni

fofo. Sa soalaupuleina loa e Alii ma Faipule, tagatanuu o le afioaga ma le ofisa nisi o fuafuaga faataatitia e foia ai nei faafitauli. O se faataitaiga o se fuafuaga faataatia a le afioaga i lenei polokalame o le faia lea o se ogasami faasao e faasa ona solia, kolosiina pe fagotaina foi. O nisi o fuafuaga faataatitia e tele ona faaaogaina e afioaga mo le pulea ma le vaaia lelei o tamaoaiga (i'a ma figota) o le gataifale e aofia ai le faasaina o;

- vailaau oona
- fanaia
- ava-niu-kini
- tuiga, faamoaa, seuga
- le fagotaina o i'a ma figota laiti
- upega ma tili mataninii
- lama moli-ula i po

O nisi o fuafuaga o Tusi Taiala i le tele o afioaga mo le pulea tatau ma le vaaia lelei o le siosiomaga o le gataifale e aofia ai le;

- aoina o alamea (crown-of-thorn starfish)
- faasaina o le lauina o le oneone o matafaga
- faasaina le lafoai o lapisi i le gataifale (matafaga)

O lenei polokalame e taua tele mo le lumanai manuia o Samoa ma ona tagatanuu. O le faaleleia o le siosiomaga ma le faatuputupulaia o le tamaoaiga o le gataifale o se faamoemoe e talitonu e mafai ona faatinoina i o tatou lava lima. E faa-tauaina tele le lagolagosua a le Pule ma le Faamalumaluga a Alii ma Faipule o afioaga i lenei polokalame.

## 2. FAAMATALAGA E UIGA I LE AFIOAGA

### 2.1 Faamatalaga o foliga vaaia faanatura o le afioaga.

Faamatalaga	Aofaiga
O le faitau aofai o le afioaga	4000 - 6000
Aofai o aoga i totonu o le afoaga	1 – Aoga Tulaga lua
O le aofai o falesa i o le afioaga	4 – EFKS, Metotisi, Assembly of God, Aupaia o Aso e Gata ai
Umi o le aau o le afioaga	4 – 5 maila
Mamao o le aau mai le Matafaga	300 – 400 mita
Loloto o vaega pito i loloto o le aloalo pe a pe le tai	8 futu
Loloto o vaega pito i loloto o le aloalo pe a pe le tai ao lei afaina i afa	8 – 10 futu

### 2.1 Faigafaiva

Faamatalaga	Aofaiga
Faitau aofai o tamalolo faifaiva e fagogota i le sili atu ma le tasi le aso o le vaiaso	> 100
Faitau aofai o fafine faifaiva e fagogota i le sili atu ma le tasi le aso o le vaiaso	80
Faitau aofai o tagata e fagogota i tuaau mai le tasi le aso o le vaiaso	21 – 25
Aofaiga opaopao e faaaogaina mo faigafaiva i totonu o le afioaga	30
Aofaiga o alia fagota o loo faaaogaina mo faigafaiva a le afioaga	1
E faatagaina ni tagata fagogota mai isi afioaga e fagogota i lo outou gataifale?	leai

<b>Ituiga I'a/FIGOTA</b>	<b>Faigafaiva</b>	<b>Taimi faaalu mo le tasi le tau'i'a ma ofu</b>	
		<b>Taimi nei</b>	<b>10 Tausaga ua tea</b>
<b>I'a maua soo</b>			
1. Mataeleele 2. Fugausi 3. Laea 4. Malau 5. Filoa	Mata/ Lama Faga Lama Ofe Afaafa loloa	30 minute 30 minute 1 – 2 itula 10 minute 1 – 2 itula	15 minute 10 minute 30 minute 5 minute 10 minute
<b>FIGOTA maua soo</b>			
1. Iga 2. Sea 3. Lumage	Aoiga Tuissea Aolumage	1 - 2 itula 30 minute 30 minute	15 minute 10 minute 10 minute

<b>Isi Faigafaiva</b>		<b>Isi Taumafa o le sami</b>	<b>Taimi faaalu mo mea ua taua (itula)</b>
Tioata	X	Tuitui	30 minute
Tosotoso	X	Faisua	1 itula
Upega	X	Ula	1 ma le afa itula
Seuseu	X	Paa	30 minute
Pulu	X	Sea	15 minute
Fagapusi	X	Laumei (tasi)	2 itula

### 2.3 Vaega taua o le siosiomaga o le Gataifale

<b>Vaega</b>	<b>Vaega taua</b>	<b>sikuea mita</b>
	<b>Taimi nei</b>	<b>Sefulu tausaga ua tea</b>
Togatogo	700 sikuea mita	1000 sikuea mita
Amu	Laititi ifo i le 700 sikuea mita	2000 sikuea mita
Vaovao o le sami	700 sikuea mita	1500 sikuea mita

## 3. O LENEI FUAFUAGA TATAU

### 3.1 Autu

O lenei fuafuaga tatau, o le vaava'aia lea o itu lelei e toe ati'ae ai le gataifale ina ia iai ni suiga lelei e totogo ae ai mo se manuia o tagatanuu o Salelologa mo nei ma taeao. O le faamoemoe mauluga o le Malo e tauala atu i lenei polokalame, ina ia faatupula'ia atili le tamaoaiga ma fofoga taumafa mai le sami. O le isi itu taua, ia manuia ma maua le soifua maloloina o tagata o le afioaga i le lumanai. E manaomia ai tagata uma ia galulue faatasi e ati'ae le gataifale i fuafuaga lelei e puipuia le siosiomaga o le gataifale ma fuafua tatau ai le soona fagotaina o i'a ma figota. E tasi le manatu na auga uma iai finagalo faaalia o vaega eseese o le afioaga i taimi o fonotaga, lea na faailoa mai e le Komiti Faufautua mo le Va'aia lelei o i'a ma figota (KFVL). O lenei autu, ua faamatalaina atu i lalo.

**"Ina ia puipuia le siosiomaga o le gataifale ma le toe faatupula'ia o i'a ma figota mo tupulaga o le lumanai"**

Na ta'ua e le Komiti (KFVL), o le Fono a Alii ma Faipule latou te faamalosia ma una'ia vaega eseese o le afioaga e galulue faatasi e puipuia ma faasao alamanuia o le gataifale o Salelologa. O le Komiti o loo gafa ma le tapenaina o tulafono aemaise o fuafuaga faataatitia a le afioaga mo le faalauteleina o le malamalamā i le polokalame. A maea le tapenaina o lenei fuafuaga atoa, ona tuuina atu lea i le pule mamalu a Alii ma Faipule mo le paisaina.

### **3.2 Tapenaga**

O le tapenaina atoa o lenei taiala, sa gafa lava ma le mamalu o le afioaga o Salelologa, ae le tu'ua ai foi le lagolagosua a le Ofisa o Faigafaiva e ala atu i a latou fautuaga. O loo taina atu i lalo se otootoga i le tapenaina o le polokalame mai le uluai taimi se'ia oo ina faatinoina.

**Feiloaiga Muamua:** O le feiloaiga muamua, sa faafesootai ai e Loimata Leena ma Totive Aloaina o le Ofisa o Faigafaiva le afioaga i le Aso 14 Fepuari, 1997. Na mafua lea feiloaiga ona o se talosaga mai le afioaga mo se fesoasoani i lo latou gataifale.

**Fono Muamua:** O le tauaofiaga o le Fono Tele a le Afioaga i le Aso 18 o Fepuari, 1997, na taliaina aloaia ai e le afioaga le polokalame. O le aso lava lea na faamalamalama ai leuiga ma le autu tonu o le polokalame.

**Vaevaeina i Vaega:** O vaega sa vaevae iai le afioaga, o le Komiti a Matai, Komiti a Tina ma Tama'itai ma le Komiti a Aumaga. Sa feiloa'i nei vaega eseese ma sui o le Ofisa o Faigafaiva, ma faatalatalanoaina ai loa faafitauli o loo alia'e mai i le gataifale o le afioaga. E le gata i lea, na talanoaina ai foi ni fofo e ono fo'ia ai nei faafitauli.

**Komiti Faufautua mo le Va'aia lelei o I'a ma Figota:** O le Komiti lenei, e tofusia uma mai ai Komiti a Matai, Tina ma Aumaga ma sui ta'i toalima. O latou tonu ia sa tuufaatasia faamaumauga ma faamatalaga uma mai vaega taitasi, ma na tapenaina ai loa se ata faataitai o se taiala e pulea ma va'aia lelei ai I'a ma Figota o le gataifale o Salelologa. O i o loo aofia uma ai manatu ma lagona faaalia o tagatanuu o Salelologa i le mataituna o faigafaiva talafeagai ma le siosiomaga o lo latou lava gataifale.

**Tauaofiaga o le Fono Tele:** O le fonotaga faaiu a le Afioaga ma le Ofisa o Faigafaiva, sa tauaofia i le Aso 6 o Me, 1997. O le fono foi lenei sa pasia aloaia ai le Tusi Taiala a le afioaga, atoa ai ma Fuafuaga Faataatitia uma o loo tamauina ai.

## **4. TULAFONO FAALENUU I ASO UA MAVAE MA ASO NEI**

O le tele o tulafono i aso ua tuanai, o loo faaaauau pea ona faaaogaina e le afioaga. O nei tulafono e aofia ai le faasaina o fanai'a, ava niukini ma vailaau oona. Sa leai se faamalumaluga a le Malo i nei tulafono, pe faamalosia foi ona faasaina. Sa tele le soona fai ma faatautala le faagotaina o le gataifale e le tele o tagata, ona o loo mafaufau na o le taimi nei, ae le manatu i le taimi o i luma ma tupulaga o loo fai a'e a le afioaga.

O le faaaogaina o fanai'a, vailaau oona ma isi lava faigafaiva le talafeagai mo fagotaga, ua faasaina ii gataifale o Salelologa. Peitai, e iai nisi tulafono ua maea ona faasalalauina i le leitio (2AP) i aso ua mavae, ma ua molimauna e le komiti le faamamaluina pea e le afioaga e oo mai i le taimi nei. O le a toe faamalosia le faamamaluina atili o nei tulafono aua o lea pasia aloaia le Tusi Taiala a le afioaga.

E le gafatia na o le malosi faaletulafono a le Malo ona malu puipuia le siosiomaga o le gatafale ma ona tamaoaiga. E utiuti tulaga tau tuge, ma e toagaogao foi le aufaigaluega a

le Ofisa o Faigafaiva latou te faamalosia ma una'ia tulafono tau faigafaiva i afioaga ma alalafaga taitasi o Samoa i Sisifo. O tali ma fofo o nei faafitauli uma o loo i aao lava o tagatanuu o alaala ma pāpā'a'ao i le afioaga aemaise le faamalumaluga a alii ma faipule. O le una'ia o tagata ina ia galulue faatasi e malupuipuia ma faaleleia le siosiomaga o le gataifale, o le a le pine ae tulai mai ai le gataifale o Salelologa i se tulagoa mauoa ma tamaoaiga i le sami.

## 5. FUAFUAGA FAATAATITIA

O fuafuaga faataatitia o ni gaoioiga ua faamoemoe e faaono foia ai faafitauli ua faaalia ma faailoa mai e vaega eseese o le Afioaga. E lua ituaiga fuafuaga faataatitia ua fuafuaina. O le fuafuaga faataatitia ua aupito sili ona taua, o fuafuaga faataatitia a le afioaga. O le isi fuafuaga faataatitia, o le pitolaau lea a le Ofisa o Faigafaiva, ma o i tonu e taua ai fesoasoani e tuuina atu e le Ofisa i le afioaga, e ala i pepa o faamatalaga ma le faia o mafutaga faaleaoaoga. O le faatinoga uma o faufuaga faataatitia a le Ofisa, e ao ona faamaonia ma sainia muamua e le Faatonu Lagolago a le Ofisa o Faigafaiva. O nei fuafuaga faataatitia e aofia ai le faia o ni faatalatalanoaga e faalauiloa ai le taua ma le aoga o le Polokalame Faasao i nuu ma afioaga, e le gata i lea, ae tufatufaina atu foi Pepa o Faamatalaga e faamalamalama atili ai finagalo o le afioaga. O fuafuaga faataatitita uma a le afioaga na faavae ma paisaina i se fonotaga na faia i le Aso 9 o Aperila, 1997, ma aiaia ai ni tulafono e faasaina ai:

- Fiagafaiva le talafeagai e pei o fanai'a, ava niu kini ma vailaau oona.
- Lauina o fugafuaga, maisu ma amu.
- Lapisi lafoai ma le faatafunaina o le gataifale.
- Faafaatoagaina o i'a ma figota i le sami ma vai magalo.

O se aotelega o nei fuafuaga faataatitia na faapogai mai lea i faatalatalanoaga o faafitauli ma tali talafeagai i fonotaga ma vaega eseese o le Afioaga. O nei fuafuaga faataatitia, ua aofia ai faatinoga ma tulafono e pei ona fautuaina e vaega eseese mo le fono mamalu a alii ma faipule.

### 4.1 Ina ia faamalosia tulafono e faasaina ai faigafaiva le-talafeagai i Salelologa

#### Otootoga

O le faaaogaina o vailaau ta-lavalava mo faigaifaiva i le gataifale o Salelologa, ua maitauina ai le telē ma le ogaoga o ona aafiaga. E le gata i le faatama'ia faatasi ai o i'a ma figota lapopoa ma nai meaola nini'i, o le pepe ai o amu, aemaise o le tele ma le ogaoga o aafiaga o se vaega tele o le ogasami. O lenei faalavelave, e talitonu le taofi o le afioaga, o le a tu'u tausagā se taimi e toe tau faafoi ai i lona tulaga tamaoaiga sa iai muamua.

#### Fuafuaga Faataatitia a le Afioaga

Na ta'ua e le afioaga le malu puipuia o pulega faalenuu i aso nei i totonu o le afioaga. O le fonotaga a le Komiti (KFVL) na faia i le Aso 9 o Aperila 1997, na toe faamalosia ma unaia ai le Komiti ina ia faamautuina atili le tulafono e faasaina ai faigafaiva le-talafeagai mo le puipuiga o le gataifale o le afioaga.

#### **Fautuaga**

Ina ia faamautuina ma faamalosia pea tulafono a le Afioaga o loo iai, e faasaina ai le faaaogaina o faigafaiva le-talafeagai.

#### **Taimi Fautuaina**

Na ta'ua e le afioaga, o le a aloa'ia le faamamaluina o lenei tulafono pe a maea lona pasiaina i le fono tele i le Aso 6 o Me, 1997.

#### **Tulafono**

"Ua matua faasaina lava faigafaiva le talafeagai e pei o fanai'a, ava niu kini, vailaau oona, tu'iga ma saeuga i le gataifale o le afioaga o Salelologa.

#### **Faasalaga**

O faasalaga o loo iai nei, soo se tagata e maua o faia lenei soligā tulafono, o le a faasalaina o le \$100. Ae peitai, afaei le usita'ia lenei faasalaga, o le tuuina atu loa i le Ofisa o Faigafaiva mo le tuuina atu i le Faamasinoga i lalo o le Tulafono Autu Tau Faigafaiva, 1988.

#### **Fuafuaga Faataatitia a le Ofisa o Faigafaiva**

O le faatinoga o fuafuaga faataatitia faataatitia a le Ofisa o Figafaiva, e mulimilitai i le fuafuaga faataatitia a le Afioaga. E fesoasoani i le faamalamalamaina o pepa o faamatalaga e faasaina ai faigafaiva le-talafeagai ona o le ogaoa o ona aafiaga. E tuuina atu ai foi ma fautuaga i le afioaga e ala i le tausia ma le va'aia lelei o lo latou gataifale.

### **4.2 Ia faasalalauna Tulafono a le Afio'aga**

#### **Otootoga**

Ua fautuaina e le Komiti (KFVL) le tatau ona faasalalauna o tulafono a le afioaga aua le puipuiga o le siosiomaga o le gataifale ma ona tamaoaiga. Sa iloiloina foi e le Komiti, e ao ona toe faasalalauna tulafono i aso ua mavae, faatasai ai ma nisi o tulafono fou ina ia mafai ona silafia uma e le lautele o le afioaga aemaise o le atunu le taua o nei tulafono.

#### **Fautuaga**

Ua mafua ona faia lea faasalalauga, ina ia silafia uma e le atunu ma nofouta ai e tusa ma tulafono ua aiaia.

#### **Taimi Fautuaina**

O le a faasalalauna uma tulafono a le afioaga mo le puipuiga o lona gataifale pe a maea ona pasiaina i le Fono Tele i le masina o Me, 1997.

#### **Autu o le Faasalalauga "Puipuiga o le Gataifale o Salelologa"**

#### **Fuafuaga Faataatitia a le Ofisa o Faigafaiva**

O le a fesoasoani le Ofisa o Faigafaiva mo le faatinoina o fuafuaga faataatitia a le Afioaga e ala atu i lana polokalame fesoasoani faatasai ma le lagolagosua i faamatalaga ma fautuaga mo le faamautuina o fuafuaga. E le gata i lea, ae o le a faasalalauna foi e le Ofisa o Faigafaiva tulafono a le Afio'aga e ala i lalo o lana Tulafono Faatonutonu.

### **4.3 Tulafono e taofia ai le faatafunaina o le gataiflae – lafoaiina o otaota i le sami ma le matafaga.**

#### **Otootoga**

Ua pasiaina foi e le Komiti (KFVL), ina ia tuuina atu se talosaga i le Malo mo se taavale lapisi mo le motu o Salafai, aemaise lava le afio'aga o Salelologa ua fai ma taunuuga o femalagaiga aemaise le feafioai o le atunuu. O se tasi itu e faaopoopo i le talosaga, o ni atigi kalone lea e lafo iai soo se lapisi e amata mai le uafu seia oo i ona nuu tuaoi. Ua pasiaina foi e le Komiti ina ia fautuaina le matagaluega a le Malo, ona o nisi o masini ma atigi taavale ua faapena ona lafo'ia i le suatai ma tafe atu lona elea i gataifale, ina ia tuutuuina i luga i le pa'u mātū. O le a fautuaina foi le Matagaluega a le Malo ina ia faia se fuafuaga i uamea o le uafu tuai o loo ai, afai ua le o toe faaaogaina, ia tatau ona aveesea ona o le elea o nei uamea e afaina ai foi nisi o meaola o le gataifale.

#### **Fuafuaga Faataatitia a le Afio'aga**

O nisi o fuafuaga faataatitia a le Afio'aga, o le va'aia lelei lea o i latou o loo faia pea lenei solitulafono, ma ia taumafai e faamamaluina ma faamalosia tulafono.

#### **Tulafono**

"Mo le mamalu o le atunuu o loo feafioa'i e ala i pasi ma vaa e faapea: Ua matua faasaina ona toe lafoai lapisi ma otaota e pei o atigi apa, fagu, uamea, pepa iiila, ma soo se isi lava ituaiga lapisi i le sami ma le matafaga, ma soo se nofoaga i totonu o lenei Afio'aga.

#### **Faasalaga**

O le le utagia o lenei faasalalauga, e le itiiti ifo i lalo ma le \$1000, poo le molia loa i le Tulafono Laititi a le Afio'aga.

#### **Faamatalaga Faaopoopo**

Sa faaalia e se tasi o sui o le Vaega o Fuagafanua ma le Siosiomaga sa auai i le fonotaga i le Aso 23 o Aperila e faapea, o le tulaga ua faatalosaga mai ai le afio'aga mo se taavale lapisi atoa ai ma kalone lapisi, o lea ua iai fuafuaga a le Malo mo le faia o se Taulaga mo le motu o Savaii i le afio'aga o Salelologa. O lea, afai ae faamautuina lea tulaga, o le a faia uma loa fuafuaga e pei ona faatalosagaina. E fuafua ma faamoemoe nei taumafaiga ma lona faatinoina i tulaga ma faiga e pei ona faia mo le taulaga o Apia. E le gata i lea, ae o le a faamoemoe le Malo i le fesoasoani mai ma le lagolagosua a le Afio'aga i le faatinoina uma o nei taumafaiga aua le faamatagofieina o Taulaga aemaise o le Siosiomaga.

#### **Fuafuaga Faataatitia a le Ofisa o Faigafaiva**

O le a fesoasoani le Ofisa o Faigafaiva mo le faatinoina o fuafuaga faataatitia a le Afio'aga e ala atu i lana polokalame fesoasoani faatasi ma le lagolagosua i faamatalaga ma fautuaga mo le faamautuina o fuafuaga

### **4.4 Tulafono e taofia ai le lauiseina mai o fugafuga, maisu ma amu mai le gataifale o Salelologa.**

#### **Otootoga**

O nisi o tulaga ua mautinoa lona tulaga faaletonu, o fugafuga ma maisu. Ua le gata foi i lea, a ua faapea foi amu. O le aveesea o nei meaola mai ogasami o lenei Afio'aga ma faatauina atu i fafo ua avea ma itu e faaitiitia ai ma faasolo atu ai ina mou atu. O lea sa talanoaina ai loa e le Komiti le faia o se fuafuaga mo lea faafitauli.

#### **Fuafuaga Faataatitia a le Afio'aga**

Ua molimauina e le Afio'aga le faanoanoa i nisi kamupani poo tagata foi mai fafo o loo latou faia lea tulaga, ma ua galulue nei iai le Afio'aga ma le Komiti ina ia foia lea vaega.

#### **Fautuaga**

Ua fautuaina e le Komiti ina ia faia se tulafono e taofia ai Kamupani ma isi tagata mai le aveeseao nei figota mai le gataifale o le Afio'aga.

### **Tulafono**

"Ua matua faasaina lava soo se Kamupani ma isi tagata mai le aveesea figota e pei ona ttau (fugafuga ma maisu) faapea foi ma amu mai le gataifale o Salelologa"

### **Taimi Fautuaina**

Ina ia aloaia le faamamaluina ma le faamalosia o lenei tulafono pe a mavae le Fono tele e pasia ai le Pulega o le Siosiomaga o le Gataifale ma le Va'aia Lelei o i'a ma figota i le Aso 6 o Me, 1997.

### **Faasalaga**

O le le utagia o lenei tulafono o lona faasalaga e le itiiti ifo i lalo ma le \$1000, poo le molia i le Tulafono.

### **Fuafuaga Faataatitia a le Ofisa o Faigafaiva**

O le a fesoasoani le Ofisa o Faigafaiva mo le faatinoina o fuafuaga faataatitia a le Afio'aga e ala atu i lana polokalame fesoasoani faatasi ma le lagolagosua i faamatalaga ma fautuaga mo le faamautuina o fuafuaga.

## **4.5 Ia iloiloina le tulaga talafeagai ma le lelei o le gataifale mo le tufaina atu ma le faa-faatoagaina o i'a ma figota.**

### **Otootoga**

O le tufaina atu ua faatatau lea i le aumaia o ni i'a mai se isi atunuua ma tufa atu e faaola i se ogasami ua talafeagai. O le faa-faatoagaina ua faatatau lea i le faaolaina-i-vai o i'a, ma figota i se ogasami ua saunia. O le tufaina atu ma faa-faatoagaina, o nisi ia o auala faa-atinae mo le faatupuina o i'a ma figota aua le fofoga taumafa o se Afio'aga. O nei auala faa-atinae e moomia ai lava le galulue filiga ma le faamaonia o le Afio'aga ina ia ausia se taunuuga lelei.

Na tasolagaina foi e le KFVL le faia o se aoaoga ma le tuuina atu o ni faamatalaga mo le faaolaina-i-vai o i'a ma figota i totonu o Salelologa. O le a iloiloina foi e le Ofisa o Faigafaiva le tulaga talafeagai o le faatinoina o lenei ituaiga o atinae i le Afio'aga. O lenei fuafuaga e faamoemoe lona faataunuua pe a maea le suesueina e le Ofisa o Faigafaiva , ma ua talafeagai lelei le vaega ua filifilia mo figota, aemaise o i'a e fia faaolaina i vai.

### **Faamatalaga Faaopoopo – Tufaina o Figota**

O le tufaina atu ua faatatau lea i le aumaia o ni figota poo se ituaiga o figota mai se isi atunuua e faaolaina i se ogasami ua talafeagai lelei. O le tufaina o le figota o le aliao i le tele o atunuua o le Pasefika, ua mautinoia ai le tele o ni faamanuiaga na mafai ona seleseleina e nei atunuua. I Fiti, na mafai ona toomaga iai tagata i le aano o le aliao e aea ma meataumafa. O lona atigi na mafai ona faatau atu e gaosi ai faamau o ofu i fale-gaosimea. I le Atu Kuki, e tusa ma le 280 aliao na tufaina atu iai, ma na mafai ona maua mai ai se aofaiga e tusa o le 200 tone o atigi aliao i le tausaga na faatauina ai i fale-gaosimea. I le 1990, na tufaina atu ai i sami o le motu o Namua i Aleipata le 41 o aliao, ma e le o iloa tonu le tulaga ua oo iai nei aliao.

I le tele o vaega o aloalo ma a'au o Samoa i Sisifo, o loo maua ai figota e pei o le pae, asi ma le tugane. O nei figota, ua mautinoia lo latou faaitiitia talu ai o le fagotaina e tagata

mo le fofoga taumafa, ae ua faapena foi ona faatamaiaina o latou nofoaga e afa malolosi. O le tele o nofoaga ua le toe maua ai nei figota, pau le faamoemoe, o le aumaia lea o ni figota mai nisi atunu ma tufaina atu iai aua le faaolaina i nei vaega ole gataifale.

### **Fuafuaga Faataatitia a le Afio'aga**

E ao i le Afio'aga ona:

- Galulue faatasi ma le aufaigaluega a le Ofisa o Faigafaiva ile faainoina o le iloiloga pe talafeagai ma lelei le gataifale o Salelologa i le tufaina atu ma le faa-faatoagaina o i'a ma figota.
- Auiliiliina o le lipoti o suesuega o le gataifale, ma ia faia se faaiuga i le faatinoina o nei atinae i totonu o Salelologa.
- Galulue faatasi ma le aufaigaluega a le Ofis o Faigafaiva i le faatinoga o le iloiloga pe talafeagai ma lelei le vai o loo iai nei i totonu o le afio'aga mo le faa-faatoagaina ai o i'a e pei o tilapia.
- Galulue faatasi mo le leoleoina o nei atinae ma le vaaia o tagata o loo latou faatamaiaina ma solia tulafono e faatatau i nei atinae.

### **Fuafuaga Faataatitia a le Ofisa o Faigafaiva**

O le Ofsa o Faigafaiva o le a:

- Tuuina atu ni fautuaga ma ni faamatalaga mo le tausiga ma le fafagaina o i'a ma figota ua faaolaina-i-vai pe afai ae talafeagai le faia o lenei atinae i totonu o le Afio'aga.
- Tuuina atu i'a poo figota mo le tufaina atu i ogasami ma le vai ua fuafuaina atoa ai ma le faa-faatoagaina i vai ua saunia.
- Fesoasoani i le vaaia ma le mataituna o le sologa o le tuputupu ae o meaola ua atinaeina.

## **4.6 Ia una'ia Faigafaiva i tua'au ma Aoaoga mo faigafaiva.**

### **Otootoga**

E mafai ona faaono faaleleia le tamaoaiga o i'a ma figoa maua i luga o le a'au ma vaega o le gataifale ua faaleagaina, pe afai ae faaitiitia le fagotaina o nei vaega o le gataifale poo le una'ia o tulaga tau faigafaiva i tua'au. O se tasi o auala e faaono faaleleia ai le tamaoaiga o le gataifale, o le fagotaina lea o ogasami o le gataifale e le fagotaina lava, aemaise o tua'au.

Ua iai le talitonuga i le KFVL e ao ona una'ia ma faamalosia faigafaiva i tua'au ina ia tuumamaaina ai le fagotaina o le a'au ma le aloalo. Ua le gata foi i lea, ae o le a mafai ai ona toe faatupulaia ma faaleleia le tamaoaiga o le tele o vaega o le gataifale ua faaleagaina. Talu ai ona o le tele o nuu e leai ni vaa e talafeagai mo le fagotaina o tua'au o lea ua taumafai ai le Vaega o Faigaiva e sailia ni vaa talafeagai mo lea faamoemoe i se tau taugofie, ae faatupeina lava e le Afio'aga.

### **Fuafuaga Faataatitia a le Afio'aga**

Ua talosagaina e le Afio'aga i vaa-fagota se lua (2), tusa lona umi ma le 15 futu, ona ua le o po se lilo o lenei Afio'aga e tusa lona faitau aofai ma le 4000 – 6000 tagata, ma ua mautinoa foi le moomia tele e pitonuu e fitu o Salelologa se aofaiga talafeagai o vaa e gafataulimaina ona tali ai le tulaga faaletonu ua iai nei aau ma le aloalo, a ia mafuli atu faigafaiva i tua'au.

Ia talosagaina le Vaega o Faigafaiva ina ia faatinoina se aoaoga i auala tau faigafaiva e

aoaoina ai le autautai o le nuu ma ia faatautaia e se Alii Ofisa o Faigafaiva ua iai se tomai faapitoa tau faigafaiva faa-onapo nei.

**Faamatalaga Faaopoopo – Vaa mo fagotaga i tua’au:** O le leai o ni vaa talafeaai mo fagotaga i tua’au, o le ala lea ua avea ma vaegase i le una’ia o faigafaiva i tua’au. E leai se vaa fagota e i le va o le alia ma le paopao, ma o se vaa i lea va ua talitonuina o le a talafeagai mo faigafaiva i tua’au. I sailiiliga a le Ofisa o Faigafaiva i se vaa talafeagai, ua filifilia ai le vaa e i la va o le 14 - 16 ft, ma o lona tau ua fuafuaina e \$9800, tuufaatasi iai ma lona afi (15 HP), tasi (1) le taula, lua (2) ofu faaola, lua (2) foe, ma mea fagota e tusa lona tau ma le \$200 tala. O lenei ituaiga vaa, e mafai ona faaaauvaaina e ni tagata se toalua pe toatolu foi, ma e mafai ona faaaogaina lenei vaa i faigafaiva i tua’au. O le a fesoasoani le Ofisa o Faigafaiva i faalapotopotoga taitasi mo faamatalaga e uiga i vaa. O le a faia foi ni aoaoga mo le saogalemu i luga i le sami, teuina ma le va’aia lelei o i’a, tausiga o vaa, atoa ai ma le faiga o mea fagota.

### **Fuafuaga Faataatitia a le Ofisa o Figafaiva**

O le a iloiloina e le Ofisa o Faigafaiva manaoga i auala tau faigafaiva e ao ona fesoasoani ai e aoaoina le mamalu o le au-tautai o le Afio’aga. O itu taua o le a aafia i nei aoaoga, e pei o le teuina ma le va’aia lelei o i’a, saogalemu i luga o le sami, tausiga o afi o vaa, ma isi lava mataupu taua.